



LINYON

Piblikasyon Linyon Demokratik Seselwa

Vol. 4

No. 4

Le 26 Avril, 2019

Avek en Gouvernman ki Sourd lo son Pep

In ler pour LDS pran kontrol

Depi sa dernyen 2 lannen, anefe depi 15 lo 10, lepep Seselwa in reganny son lavwa e in deside pou rebran kontrol lo son desten. Atraver Lasanble Nasyonal, bokou laverite in sorti e keksoz nepli parey avan. Seselwa in deside pou vin met dan son prop pei.

Malerezman nou annan en gouvernman ki sourd lo son pep. Danny Faure pa pe ekout personn e personn dan son gouvernman pa pe ekout li. I zis en dezord. US pe redi son kote e State House pe fer pou li.

Antretan personn dan sa gouvernman pe pe antann leokri lepep Seselwa !

Pri lavi i ser e sa ki pli ba lo latasaler pe santi douler pli for ki bann ki anler. Me ki Danny Faure i fer :

ler LDS i dir partaz sa gato dan en fason ki sak travayer a ganny menm groser bout, i met Spiker Lasanble Nasyonal ankour, akoz li i pe protez son gro lapey prezidan. Anba sistenm ki US pe fors dan nou lagorz, malere pou ganny 274 roud logmantasyon me Danny Faure pou ganny 3,600 roud aplis. Eski sanmenm sa lazistis sosyal ki zot prese toulezour?

Nou dan LDS, nou pa pou zis asize e les nou pep dan soufrans. Nou pou kontinyen lite pou annenn sa sanzman gouvernman. Nou pou kontinyen kri « DANNY OUT » ziska ler sa msye ava tann nou lavwa. Dimans le 28 Avril, alokazyon lafet travayer ki pe aprese, nou pou lo laplenn Roche Caiman kot nou pou ankor enn fwa

demann Danny pou ekout soufrans sa pep. Nou mesaz i kler : ***“Si ou pa kapab fer en vre diferans dan lavi lepep Seselwa, kile, Msye Faure, les LDS pran kontrol e annenn boner e prosperite pour tou dimoun”***

Ozordi nou’n war difikilte travay avek en Prezidan ki napa menm vizyon pour nou pei. An efe, Msye Faure ansanm ek parti US in perdi okenn vizyon e ozordi pe rod zis prezerv zot pozisyon e privelez.

Prezan, ler LDS pe rod amelyor kondisyon travayer e soulaz dimoun ki pli dan bezwen, zot pa dakor e zot rod manyer met retar.

Sa divizyon pouwar pe met retar dan lavenir lepep Seselwa e in ler pour avans en nouvo vizyon. In ler pour LDS pran kontrol.

MITING PIBLIK

Roche Caiman - Le 28 Avril, 2019

aparti 3.00 er apremidi

Bann pwenn so dan politik pour sa lannen 2019 e a lokazyon lafet traver.

Danny Faure ek US lo semen depar!

“Nou’n tro get nou lekor... »

Dapre Simon Gill, dernyen parol ki Albert Rene ti dir li se ki zot in tro get zot lekor e ki zot in bliye ki zot la pou travay pour Seselwa. Wi, Simon, i paret ki ou’n ekout sa parol byen atantivman, me malerezman ou pann konpran son valer

Son detywa zour apre, sa menm Simon in vin dan Lasanble e in lager lebra kase pou li ganny en gro log-mantasyon lapey pou li personelman e enn pli gro ancor pou son sef Danny Faure. Parmi tou sa bann dimoun lo komite santral US, ou ti ava mazinen ki sa ki’n lekol Cuba pou vin defann malere. Me non, zot ancor pe get zis zot lekor, konmdir Albert Rene.

Si ou pou sanz ou manyer get kek-soz, in ler pou ou fer li konmela e pa zwe de kote meday.

Pa maltret bann ki pe ale

Depi detywa semenn, nou pe ganny lenformasyon ki en kantite

siporter Lepep/US pe kit sa parti e pe zwenn lafors avek LDS. Sa bann dimoun ki’n sanz zot lide pe aprezan ganny maltrete e ensilte par zot ansyen dalon. Lo Facebook sa bann dimoun pe ganny maltrete pli ba ki later.

Bann siporter US I bezwen konpran ki se zot bann lider ki’n trai sa pep, pa siporter. Ler ou sanz ou prensip kot ou ti debout pou bann ki pli mizer e ou aprezan rod zis pou bann ki pe deza ganny gro lapey, ou pa krwar ki ou siporter i annan rezon pou araze ?

Antretan, Danny i «so cool... »

Lavi I kritik dan Sesel? Kekfwa zis pou en bann! Ler deba partou dan pei pe sofe e Spiker pe ganny met ankour, Danny i « so cool ». Nou trouv li dan en soumaren pe kontinyen sa konversasyon ki son sef ti’n konmanse avek losean. Apre sa nou vwar li dan laprosesyon anvil e son aswar menm i pran avyon pou al Abu Dhabi. « So cool ».

Prezidan i bezwen rann kont lo vizit a letranze

Iannan en lepok, Prezidan Faure ti donn enterviyou ek lapres apre son bann vizit a letranze. Me la dernyerman, in al de-trwa vizit e in retournen san en mo. An efe, se Lasanble ki ti bezwen demann en rapor lo en vizit resan dan Larabi Saoudit.

Raport lo bann vizit Prezidansyel a letranze i en pratik normal dan bann pei demokratik. E si en sef deta pa fer, lapres pou demann li. I pratik ki Msye Faure i devre swiv.

Me sa i zis en lekzanp ki Msye Faure pe met dekote bann prensip ki i ti anonse ler i ti komans son manda.

Pratik latransparans pe al dan desbin parey pratik travay avek Lasanble e travay pour tou Seselwa. Msye Faure pe retourn ver bann metod otokratik avek krwayans ki i pa bezwen rann kont. Me non, I bezwen.

Lo size bann vizit a letranze, lepep Seselwa i annan drwa konnen ki i al diskite e ki lenplikasyon sa i annan pour Sesel. Nou pa anvil war okenn lagreman ganny fer an sekre e apre ki nou bezwen met lobzekasyon.

Koman Prezidan, Msye Faure i rann kont avek Seselwa.

LEKO

Eski pei etranze pou enterfer dan politik Sesel?

Nou’n soke pour aprann dan nouvel enternasyonal ki Larisi in sey enflians deroulman politik dan Madagascar par donn larzan serten parti ki ti pe konteste dernyen eleksyon.

Sa kalite enterferans dan nou rezyon i fer nou demande si sa manev pou ganny servi kot nou osi.

Lenkyetid lo size in leve aköz bann zistwar lenterferans Larisi dan kanny eleksyon Lamerik.

Iannan 42 an depi ki nou pe lager pour eleksyon lib e zis, e nou pankor ganny enn ki nou satisfè avek. Dousman, nou santi ki nou pe met fondasyon pour en sistenm elektoral ki pou endepandan e transparan. Lapwentman nouvo tyermenn Komisyon Elektoral sa semenn i fer par en long travay pour asir bon eleksyon.

Nou pa kapab prezan permet ki okenn pei etranze i servi larzan pou enflians deroulman eleksyon.

Nou anvil reste zanmi avek tou pei etranze e nou kapab apresye kontribisyon ki zot anmennen pour fer Sesel avanse. Me, zot bezwen avan tou respekte nou souverennite e ki se nou ki pou deside ki i arive dan Sesel.

I kler dan lepase ki parti SPPF / Lepep in servi larzan pour aste eleksyon. Nou lizye pa fermen e apre bann transaksyon FIU ek NDEA kot larzan in ganny anvoye dan sak kot State House, nou konnen ki sa ki’n pase. Nou kwar osi ki i annan larzan etranze osi ki’n ganny met a dispozisyon parti o-pouvwar. Byen sir, sa nou pa pou kapab tolere e alor i neser ki pei ki annan relasyon avek Sesel pa enterfer dan politik e ki zot pa sey okenn manev pour enflians eleksyon.

Tou pei pou konpran sa tre byen aköz zot osi zot pa ti pou akspete ki sa i arive kot zot.

Lasosyasyon Madanm LDS SPONSORED WALK

Sanmdi le 20 Zilyet 2019 - Anse Aux Pins pour Anse Royale
Vini ou osi : Kontakte Tel. 4321122